

## Kerajaan tawar insentif untuk kenderaan elektrik

[BERNAMA](#)



DATUK Seri Mohamed Azmin Ali. FOTO Bernama

Kuala Lumpur: Kerajaan menawarkan insentif dalam bentuk pengecualian cukai langsung dan tidak langsung bagi aktiviti pemasangan atau pengilangan kenderaan elektrik (EV), pembuatan komponen serta pembangunan ekosistem seperti fasiliti pengecasan.

Menteri Perdagangan Antarabangsa dan Industri Datuk Seri Mohamed Azmin Ali berkata, antara insentif yang dinikmati oleh pengeluar produk tulen adalah taraf perintis, elaun cukai pelaburan serta pengecualian duti import dan eksais.

"Malaysia mengambil pendekatan banding dan tawar dengan melaksanakan dasar yang komprehensif, jelas dan konsisten merangkumi keseluruhan rantai bekalan industri EV serta memberi galakan dalam meningkatkan penggunaan EV.

"Manakala pesaing serantau memberi tumpuan insentif hanya kepada pengilang peralatan asal (OEM)," katanya pada sesi penggulungan Rancangan Malaysia Ke-12 (RMK-12) di Dewan Rakyat di sini, hari ini.

Mohamed Azmin berkata, Dasar Automotif Nasional sudah menggariskan inisiatif khusus bagi memperkukuh ekosistem EV seperti pembuatan komponen kritikal, penetapan standard dan menggalakkan aktiviti pembangunan dan penyelidikan, pengkomersialan dan inovasi untuk membangunkan teknologi tempatan.

"Kementerian sedang memperhalusi cadangan pakej insentif untuk menggalakkan penggunaan EV yang antara lain pengecualian cukai jalan, pengecualian cukai pendapatan kepada individu yang memasang stesen pengecas EV dan juga insentif kepada pembeli EV melalui pelepasan cukai pendapatan," katanya.

Sementara itu, Mohamed Azmin berkata, antara satu fokus kerajaan dalam memulihkan ekonomi negara adalah pelaksanaan dasar-dasar perdagangan dan pelaburan yang terbuka dan mesra perniagaan.

Beliau berkata, pelaksanaan dasar perdagangan dan pelaburan tersebut adalah termasuk meratifikasi Perjanjian Kerjasama Ekonomi Komprehensif Serantau (RCEP) dan Perjanjian Komprehensif dan Progresif bagi Perkongsian Trans-Pasifik (CPTPP).

"Perjanjian perdagangan bebas ini akan berupaya mempertingkatkan pasaran eksport bagi produk tempatan melalui pengurangan atau penghapusan duti import di pasaran rakan dagang serta pengurangan halangan bukan tarif," katanya.

**Disiarkan pada: Oktober 5, 2021 @ 2:54pm**